

## Mažeikē

Poikē mūsa tēj Mažeikē!  
Kas aplonka, nier da peikēj.  
Laisvės gatviē užjem kvapa —  
longā veiz tarp mēdžiu lapu,  
vēsas sēinas nudažītas,  
daug skulptūru nematītu.  
Īvažīavēs, užversk galva —  
kor buokštēliē žīd trispalvē.  
Okopantams tēn panuosiē  
vīliava iškielē droušē.  
Pačiam centrē — vēini rūmā,  
truobas pri mēškū nustūmēj.  
Gatvies lēipas ka pražīda,  
Rīga spruoga iš pavīda.  
Va šermokšnē ka žīdiejē  
nešē švedams kvapa viejē.  
Kor to rasi tuoki parka,  
tuokē švara, tuokē tvarka?  
Kas pēnktuojē če sodība —  
no gražībē, no poikībē!  
Pasēdērbuom maža jūra  
ēr donguoraižiu mas torem!  
Kēik ī miesta lieksi kartu,  
bēld do tēlta — miesta vartā.  
Va dēdžiausē miesta tortā,  
katrū nieks negal sokortē —  
ta geroma pēlnē žmuonēs.  
Neužgaus ēr neišguonīs,  
tujau ateis tau padietē,  
ar to svetīs, ar žemietis.  
Če pabovus šērdēs joukēs —  
ruoduos bovā ruožiu lauke,  
plaukā kvapū priszgierē,  
galvuo mintīs praskaidriejē.  
Tor Mažeikē vēina bieda —  
varda gera nepririeda:  
ēš rajonu pats dēdžiausēs,  
to kāp Klaipieduo če jausīs,  
no vadēnās vēs Mažeikē,  
nuors jou senē īr Dēdeikē.